

天方至聖實錄

大方至聖實錄卷之十八

至聖儀行錄

聖人一言一動爲天下後世法門弟子各記其所聞見而爲集焉其大綱規模入之禮分者已載諸經傳中所謂大藏是也此不暇悉載畧記其儀表德性及其處身家訓弟子之常所謂家語也爲諸仰聖瞻顏思貽範者畧見一斑作儀行錄

儀容

天方先賢作聖象讚詞章與衍歷世賢之茲爲漢譯存其意似而已矣

於穆流形、元皇著象、天人授受之區、理氣中
融之所、惟吾至聖穆罕默德、出無入有、自有
歸無、人天仰戴、萬世瞻依、爲述儀容之畧曰、
欲覩至聖之儀容、須識元皇之氣象、乾坤體
式、造化尊長、首著穹窿之儀、眸明日月之明、
容光瑩潔、皎月麗乎天空、髮辮鬢鬢、烏雲旋
于頂上、隆準豐頤、廣額大耳、鳳目聯眉、丹唇
皓齒、周全端正、聰明見乎五官、莊謹威嚴、莊
重充乎四體、浩浩乎雲流膏潤、浸浸乎氣洽

春生項色若銀、肌光如繪、美髯華髮、文吻香
津、氣質精純兮、而溫潤襟懷坦易兮、而開明
目暗紅絲、欣時乃見眉間赤線、怒際方妍、宏
亮之聲音、不儀循而尊重、時宜之言笑、不爪
牙而威嚴、葆合天真、宜其背腹之坦直、博施
仁惠、自是拍掌之柔綿、健臂寬肩、垂手過膝、
強肱壯股、睇目懸睛、頂覆白雲、識聖躬之所
在、足生綠茵、知高蹠之所臨、香芬馥馥、以娛
人、繩趨傴僂而避體、鵠文見乎天篆、肉印當

膺藻思極于神明，披腹民欽盛德，頌三
極之精英，天挺真人，八紘之元首，秉赤符
而受命，宏開默底，結之基，樹素幟以臨民，蕩
除蘇門，翫之醜，神通通色妙，信乎心地之圓
明，感應立黃，洵乎性天之廣厚。

德性

喜怒無私，動定有制，○常悅不笑，極怒不暴，
○尊善檢身，存誠執敬，○榮會累富，嘗告主
曰，卿主若主，慈憫中生，俾其少子少財者，○

必有營藝○一日不增學，卽謂虛度○思一
德不立，如損一肢，一行不全，如喪一體○交
接有道，處已有法○恕人而律己○動止對
主○無私行，行必有正，無私求，求必爲衆○
沐浴禮拜，奉主成性，柔言施濟，愛人以常○
語言動止，交人接物，賓朋宴會，睦族和鄰，處
家出外，飲食冠服之類，無不有當然之制，無
不出自然之情○額納思曰：吾侍奉聖人十
年，不聞一慍聲○無戲言，無厲色○爾里曰：

吾見聖人起居不離乎四行、擔待也、隄防也、審度也、參悟也、而約之以謹言曰、謹言脫離一切災禍、○逆寇拋石、擊聖齒、損聖遂告曰、主也、俾其得道者、則不枉矣、○記者曰、聖人德性見於三、擔待也、威儀也、廉潔也、擔待是仁、愛忍耐之所生、威儀是克復力行之所著、廉潔是知識超卓之所成、擔待所以覆庇萬物也、威儀所以顯應萬物也、廉潔所以棄絕兩世而親向一主也、凡人具足三性、可臻功德、性可致一切貴相、立三乘學、以爲人行道之捷徑、以爲天下萬世之法程、一出自其德、

性之顯露也。三乘之學，捨禮爾脫禮格，哈幾格也。捨禮爾修身之道也。脫禮格，明心之道也。合幾格，顯性之道也。捨禮爾如樹脫禮格，如花，合幾格。如果，德性其種子也。皆所以顯其德性，成其德性也。非捨禮爾不足以成擔待，非脫禮格不足以成威儀。非合幾格不足以成廉潔。故曰：寸絲不掛，兩世無貪，是爲廉潔。合幾格之謂也。聖人者，立斯三者。

學問

以真主之知爲知。○無不知而以求習爲學。此學問之所由來也。○不耻問不吝教。曰學無長幼無貴賤有益於我者卽吾師。○晨夕告主界有益之學。避無益之學。○嘗戒弟子曰。近學者知用私者迷。不習無益之學。○交處文人達士。不牽私欲之蒙。不受異端之害。○萬事立於誠。恒其心正其意。事乃得豫。○曰。傳學必爲明道。近主用其顯跡在於絕會。愛貧日淘溶於學問。一事未遵。不得放過求。

學必爲明理行道用其顯跡在於謙和謹慎
明昧之中不違於理一理不明不可放過○
遠處求學在主安養之中愈遠者愈多福慶
○萬物有盡學問無盡○以務學之心終其
身者聖位待之○薦天方之學者增廣仁義
分明義理

沐浴

沐浴方云阿卜德斯
○浴方云務斯立

聖無時不有阿卜德斯而於每拜時復沐曰
沐上沐光上光也○聚日與兩會日必浴○

曰沐浴是穆民之盛甲，邪魔畏之，不敢侵。○
必周全當沐之體，一毛不到，不稱其功。○一
日示弟子每體洗一遍，曰：此僅可之沐也。又
日每體洗二遍，曰：此高強之沐也。又日每體
洗三遍，曰：此我之沐也。卽千古聖人之沐也。
○沐浴者，水以滌其身，道以滌其心，表裏潔
也。非徒淨其表也。○潔而生，潔而死，卽得證
道品。○沐浴三等：大淨、小淨、中淨。大淨全是
洗務，斯立也。小淨全是抹拭，厭捫也。中淨亦

洗亦抹。阿卜得斯也。○任有多過。能洗滌其
身。潔誠其心。則庶幾於能悔而已。可潔矣。○
潔已近主之道也。

禮拜

一日五時赴寺無間。○拿究不赴寺者。○曰
禮拜是教門之生命。其滋養則在定信。與赴
者。馬二忒。○三時不赴寺者。焚其室。○急就
頭班。○補頭班是損納。○禮拜要莊謹嚴格
無簡慢。○端正規矩。惟聖人能之。雖時有簡

畧不廢禮儀。○簡畧在者馬二不可除在夏
晌。或人多有務之時。○歡踴赴寺。憂懼還家。
曰吾不知是功蒙准也否。○最敬主馬。日是
日多念告赦語。午前頌克合福數。勒沐浴盛
服。弁冠薰香持敬入寺。○日纏巾而禮主馬。
功貴於無纏巾七十倍。○日月蝕拜。禱祝告
赦。以開明復圓止。○旱潦凶風陰霾拜。悲哀
疏過以平寧止。○寺內不言塵事。○殿庭不
施五采。

後人爲莊嚴能起敬畏用之同也

○嘗論人打掃寺

宇殿庭去其塵灰蛛網。○曰潔心潔身潔衣
潔處昭敬之儀。格主之機。

念主

念主無時不間呼吸。○曰隱微貴於顯揚。心
念美於口念。○念証言爲至貴。次讚聖。次告
赦。○入事頌忒思米葉望慈也。歷事念忒卧
克立突托庇主也。力艱念喇蒿勒求助也。事
畢念額立罕獨淋喇希威謝主也。閒暇則念
清真言。纔覺有過。卽念告赦語。事事時時不

離乎道也。○曰人無時無過一息忘主卽過也。○普訓弟子習誦清真言引弟子入淨室。聖上跪面南。弟子下跪面北。正對抵膝。兩手撫膝上。端首正身念喇一喇合。以全身之力念之。將氣從丹田之下提起呼出。既竭然後念印。樂喇乎。以全身之力念之。將氣出口唇納入心中。聖如是念。弟子如是習。○曰念喇一喇合時存想心間。將萬物從胸中推出。念印樂喇乎時。心間存想獨存一主於心。凡人

如是念清真言卽進天堂矣。○墨阿子往教耶滿。聖人囑曰。若二氏人問爾天堂之鑰匙。爾對曰。天堂之鑰匙。清真言也。

頌經

聖每四十日圓一號經。又每一年圓一號經。圓於夜初。或晝初。總集后妃眷屬。臧獲而圓之。○頌經之儀。先出淨沐浴。刷牙淨口。服淨衣冠帶。整齊。面向克而白。直跪無倚。焚香止靜。開章有告。終篇有告。○每起頌。必求護誦。

名美音朗。頌無惡聲。無濁聲。飄逸舒緩。無急聲。無躁聲。無歌唱之聲。○頌至慈救處。則興感謝恩。至罪罰處。則恐懼求護。至尊威大。則處則稱揚讚頌。○凡欲舉動執事。必完其篇。捲卷而去。○復頌。復護辭。不復名。○曰。凡人無讀真經之文。終必啟沃其理。後世惺惺。必輕其已身之罪。並輕其父母之罪。○視頌之福。數倍於背頌。因增得日功也。○單頌不勝頌。曰。夥頌失儀者。二聞與默也。真主諭云。凡

人頌經爾輩默聽。○告弟子曰。至貴之功。行是下載。又起行。衆弟子問曰。孰爲下載。又起行。聖人曰。頌經旣畢。捧手做都阿完其求也。然後復頌者。義謂常頌真經也。○曰。凡人念古爾阿尼。按每頌一字。書其十功。免其十過。天堂中增其十品。又曰。多人念古爾阿尼。古爾阿尼與之惡阻。總在頌者之有道與無道。而云然也。

齋戒

聖喜長齋。○日齋止嗜欲以通神明也。○齋
止驕傲。損嗜欲。增謙和。康健身體。光明心地。
○敬齋以三事端莊也。謙和也。謹默也。○齋
則無爭。遇競者則曰主與爾安。吾齋也。○立
意後夜起。○每於捨而邦月尾之夕。尋月見
則頌主三遍曰。美哉新月。明哉新月。吾歸信
造化爾之主。感讚真主。取去往月。將其來月。
吾望其美好吉慶者云云。曰。凡新月念此多
得福慶。○未曉而食。日沒而開。無緩。○開齋

嘗以棗○齋則厚饌曰一切費用俱有拿問
惟齋日之費用否○每月中三日齋十四十
五十六日也○五日不齋開會之日○祀會之
日○與其後三日也○不專爲主馬日○齋必有
配之前或後齋一日○不專爲空日○齋不類
二氏也○曰至貴者打五德齋一日開一日
齋○齋乃無爲之功爲萬功之最難而爲萬
賞之最厚故曰齋屬主主自報之自字妙非
似他功之報以天堂宮苑也

施

有求必應。不靳煩求。○時人曰。聖之施予。古
今無並。○方食丐者至。卽與食。方炊。命待炊。
○一日無丐至。則憂。○以丐者至。爲得贏財。
○曰。主與我。我與人。彼應得之分也。我且得。
施予功。主不因我與人。而不與我也。○我與
人易。主亦與我易。我與人難。主亦與我難。○
穆民諒人有求而與之。不俟乞。乞而與之。則
殆。乞而不與。奚其爲穆民。○施予其貴。不其

賤○丐者乞其領羊

羊中第

一大者與之丐出而歡

語衆曰人胡不順其教肯捨而不畏貧○有一錢至于千錢除家之所必需不存過夜遂施與應受之貧○錦衣市行有野貧拽之動肩曰以主所與爾者與我聖回顧欣然而與之○嘗至衣袴捨盡不能赴寺○曰施捨解諸憂息獄炤能和一切忤逆人○施予必立意爲取主喜不圖名不望報○凡有施予舉爲父母意忠孝仁義俱盡也○親手給散或以

子○指迷路舉擔負訓教家屬奴婢安於正
道不罹後殃俱作佈施功○曰凡知我之所
有皆主與者則以與人無難○主不吝於與
我我何獨吝於與人况主命我與之而不與
其爲有主者乎若曰以我之能力致財也則
逆主之甚者也真是可廢兒

朝覲

朝天房也天房如天壇

戒先於衆○行禮極其嚴○塗行如拜應辭
如訴至禁地蹴踏如躬臨闕如臣之登君殿

奴之奔主室率衆遊房周廻七匝撫石拜庭
奔趨兩墩之間駙爾立法隄越母子德里膺
大射宰牲親手宰之○嘗至一手宰百駝平
素不輕宰一雞○終之年一手宰六百三十
駝○飲滲滲泉○辭朝謁庭撫轡泣涕而退
○諭弟子曰朝儀至密至煩盍記之以昭後
世因有朝儀記

語言

嘗默○不多言○言不得不言○言必有次

○言不中止○思而後言○言取近○諒聽者言○言簡而理明○言近而義遠○文辭風韻高越天下古今而無與及聲調句讀出自天然而無雕鑿傳者曰凡聖人一言一語乃至千言萬語載在經集者皆其出口原文未有弟子文人敢增潤一字者○無高聲○聲不壓人○無虛無謬除爲與人取和或爲使夫婦相悅○無競言○無怒言○無戲言○無無益之言○無妒言○無咒言○無背毀曰背毀招致

一切惡道壞一切善功。如蘆葢壞密者。○曰
背毀者之善功。輪與破毀之人。而猶得所毀
之罪。○常以謹言自飾。○曰謹言使人脫離
○兩世之傷。多自語言。○舌肉能將人趕入
火獄。○無過褒無過貶。與人言如訴。聽人言
如引。如首上有鳥立者。○不言人短。○不言
閨闥。○不言一切非禮之事。○隱惡揚善。○
言必讓老讓尊位。○語畢而後問。○問對之
間。無知愚貴賤和氣春風也。

勸止出入

勸則益人。止則益己。○每出門誦尊名。誦托
靠求助諸語。○端謹穩重。○行。手不出身。坐
足不出膝。○堂坐不正面。市行不中路。○乘
騎不擇美醜。○嘗騎驢。○步趨入市。○嘗便
服衣帽。謂行不拘滯也。○嘗抱膝危坐。○坐
無倚。穩重。周身如畏。○路有糞草瓦礫。疾爲
去之。曰是亦移民之功也。○過高樓巖牆之
下。必趨。○行坐讓老者。避顯者。○無事不坐。

市舖○市物必有提覺勸善語俾市愚於塵
紛擾攘之中起休閒輕世之念○遇人卽到
色聞問安拿手以見親愛相悅○道色聞時
不搖肩幌臂○遇雜教人不說色聞第曰安
在正道者○行坐讓古來氏人○行讓路坐
讓位○僱資○遇旅歸人樓頸拿手○親友路
逢說色聞復爲拱揖問安叙話○見寒洎人
恤之慰之必有濟之○老者執杖尊者執杖
○少不先老幼不先長愚不先知無位不先

有位。知者無老幼。顯者無知愚。

父母

生不見父母。而日言父母之道。曰父母其代
其主而生人乎。敬主之次。卽敬父母。○孝親
與奉主等。○孝子不處有過之地。不辱父母
之名。不沒父母之善。○子雖康學。無敢僭父
○父母雖二氏子。不敢自逞高大。○嘗爲父
母告赦。真命責之。尚自快快。○每撫親墓。悲
泣至痛。○曰父母之恩大也。終其身不能報。

凡以情慈之目視父母則父母心安自己心安○心敬身承躬自侍奉不違其一切所命○父母坐子侍立不命不敢坐○語必視其面無旁視無覷視無慍色高聲咳唾必反面嘔則起而去之○父母之前不誇勇不式力不伸足向之○子無私有無私事○不窺親室不因親閉門○必有營業無訴其爲業之艱難○勤學敏善屈躬跪膝於父母之前以觀其父母之喜怒親喜亦喜親憂亦憂稽其

所憂之由而解釋之得朝覲之功。○衣食從其所好。盡力寧豐。○不履危。不遊遠。○拜中聞母呼必應入。侍聞親疾則歸。○父母病先請主。後求醫。躬治湯藥。不委婦婢。○父母喪量力行禮。○隆祀典。○凡行善事舉爲父母意。○愛其所愛。親其所親。有終身無改之道。

子嗣

生子不以男喜。不以女憂。曰惟男與女。真主所寄命也。○初生命名。開乳報牲。剃髮散髮。

宴客○善爲養育防其疾患慎其衣食○衣以布不以帛不施黃色○不斬兒啼曰其譖主之音也○或爲親告赦也○孩提教之禮○幼習教之學○髫乳既見爲之婚姻○曰父母育子有天地化物之功○男女同育聰拙同愛○教子之法肇於始胎○幼而習禮○少而務學習射○齔以防不虞○子習學豐其衣食倍其用度使無紛志於營謀○習學至十五歲視其資質性格能學者終學否則爲農爲賈爲工

婚姻

舊各量其才而授之業。○無道子德無諱子
過。○富教以禮。貧教以節。固守其性德。○母
爲下賤業。母爲硬心業。○不營不義。

曰婚姻人道之始。資化之原。成國成家立身
之本也。○擇配以三教門也。根基也。貧富相
等也。○成婚以曰男家之求女氏之允媒証
與聘幣也。○年相當義相合。問三代之名視
其可視。以購求歡。○母惑於資財而致賤類。

不慕聲勢而致驕奢。○聘幣有常。多不過四百金錢。少不減十箇銀錢。○爲婚姻借貸可也。謹合禮義。無奢華。○必擇時日。○女氏鋪陳。男氏親迎。大會親友。明諭書婚。擲果拾果。開筵盛饌。俱損納也。○女子服飾量可爲佳。○男女入室。各禮二拜。告主求吉。水諧和好。舉饌饌畢。盥漱。新婦浴足。以水傾屋四隅。然後就寢。○綢繆而後近。近後少睡。○朔望無近。二食無近。疾風暴雨雷電無近。○經產之

候無近。誤入者罰金錢一枝給貧。○經婦和衣而寢。○不以多近爲榮。亦不久置。○誓置四十日不近。當作一休。○民宜四婦。○聖置九宮。特典也。有命則入。不命不敢納。無妍媸。無大小。無貧富貴賤。惟德性賢淑之是取。不需媒妁。不求聘幣。惟通示曉揚已矣。

夫婦

聖人日間勸人。夜間勸神。而御九后以守常。不以凡情而累德。后妃皆以輔德成化爲事。

賢哉聖閭也。○曰經云夫爲婦衣婦爲夫衣。兩相衛也。有相成相立之道焉。○教之以禮。食之以義。以食惟宜。居處惟安。損物無責。此爲夫之道也。○聽其言而遵其事。以其命而處其物。非有命不出室。不外見。不違夫所欲。此爲婦之道也。○男子貴于婦人十倍。一賢婦人貴于男子十倍。○夫執外事。婦執內事。無怠于烹饋浣滌。○婦無聲聞于外。○雖慶弔省親。不夫命不出室。○婦尚德不尚色。○

男無偏寵女無私妒。○婦衆必公不能公。寧
不二婦。○夫問不諱荅。夫召不託事。○夫命
事不委于諸婢。○夫怒不得去其左右。察已
過。婉容悅色以回其喜。○居貧困而守禮。遭
患難而無怨。○男女之間有大嫌焉。女子自
十歲始除同胞兄弟伯叔母舅。卽不應見。○
曰邪魔詭計。多在男女之間。

兄弟

聖人之兄弟。伯叔善者惡者相去若天壤。善

者至爲其輔佐。惡者至爲其寇仇。日事謀殺。征伐而聖一以敬愛相待。禮讓相規。嘗以橫逆加之。而復爲之告曰。主也。俾其得道。則無亂矣。又告之曰。汝等胡不順教。順教必不若是矣。國人與感順教。而兄弟恒若。則曰。吾之過也。不能教之順。而反肆其惡。由是多感涕順焉。○曰。兄弟同本之枝。並蒂之果也。必相親相顧。有不道。若手足患痛。愛恤有加。曰。吾不欲父母之身。遭諸痛苦也。○吾身親身也。

兄若弟亦親身也。傷兄弟不卽傷父母乎。○
敬愛兄弟卽猶敬愛父母也。○兄弟和天下
頌。兄弟爭天下。班。○能體父子之心愛兄弟
無不睦也。

奴僕

僮僕入卽按其額曰。爾禮拜。爾善服。爾所當
執事。復捧手告曰。主也。俾其爲吾之吉慶美
好者。○食之甘美。服之涼煖。量其力而命之
事。○勤則獎。惰則勵。○有過恕之。一日夜間。

恕七十次。不打。打不過三杖。爲教門。不爲私。
怒。執刷牙示門人曰。杖若此也。○曰。忠義良。
僕。以慈愛看顧。時撮食納其口。○損器無責。
錯悞無責。○作事不合。不曰何爲如此。第曰。
主定如是耶。○不受教者。減價賣之。○曰。良。
僕。昌發。劣僕。輸迷。大不吉也。○奴僕規模。服色異。
製。居立異處。曰。若無禁戒。便生傲慢。○三時。
不使奴僕寢時。食時。力乏時也。○教習奴僕。
誦習天經。以禮拜者。○嘗教僕郁素福。數勸。

曰奴僕之教門在主人。○主人欲其行教門而奴僕不遵不得過責寧放。奴僕欲行教門而主人不容不得自專寧贖。○贖僕放僕義行也。既放不歸許贖無執。○奴僕殷勤于教門者放之其奉主之功主人共之。

主人

與眾和同。無貧富貴賤一槩交之。各視其宜而處其當。○尊尊貴貴樂貧處賤。○不輕貧不畏勢。○教化平等貴賤貧富一般仁慈普

槩老幼上下一體。○與顯者坐無驕色。與賤者坐無德色。○交人諒其知識教門之全否。以其斤兩而待之。乃君子不爲所負。小人不致膽大失禮。○與謙下人行謙下。與驕傲人行高傲。○謙下非謂曲躬折背也。乃視天下人強于已也。○仇隙相處亦祇爲善告。○敬顯者不計教門。敬而已矣。○敬老尊學助弱扶孤。○畏望先君子施惠先小人。○受人餽者。○聞善必稱。聞惡必諱。○與童子道安。

偕侍者食。○與貧丐共席。○代弱人負物。○
善爲人善告爲君子。則曰主報之善者爲匪
人。則曰主予之善者。○相類者則目負道德
之任。勸約行忠。擔待傷害。○不顧罔言。不圖
苟安。何以故。眞主不止人之口舌于其已人
也。正欲俾他人省其爲擔待也。擔待主德也。
○穆民不以人譽而喜。不因人毀而憂。故不
避嫌疑。不畏恥辱。而成大功。

接物

順物裁物與物無忤。○見有不合則曰真主能知其必有至合之用也。○不踏蟲牙不傷蟲。不以蟲殺蟲。不因蟲殺蟲。惟取有益如獵。○療疾姑殺六生蛇蝎。鼠鳥瘋犬及一切傷人物。○以慈目闔諸禽獸。不斫其日食七次。○愛物不專。惡物不廢。各審所宜安乎其位。○不咒咀所忤。不憎惡所不合。見可憎則曰清哉真主。安其位者慈憫衆生。○見可喜則曰清哉真主。萬美具足。萬讚歸之。○見奇

則曰大哉真主。任意爲之。○見物生成。讚曰。
感讚真主。能始能終。能隱能顯。委實真主。能
千萬事。○見物損亡。誦曰。讚主清淨。萬物皆
得除主一面。萬物起。主歸于主。○不枉物
施。無不當也。

宴會

宴會必沐浴盛服。至所就便而坐。不居然一
位。衆舉上位。三讓而後坐。○不正面。不獨坐。
嘗取童子偕坐。○宴會必誦經作都阿。○入

席尚右尊老尊學尊長老讓學學讓長○舉
饌先右次左次右旁次左旁次下○食取近
不越取惟東家讓○肉必有蔬○無所增索
除醯醬○美食美器○大碗爲常忌金器喜
陶器○食于金銀器何啻目也食于銅錫器
○尊敬而食○不啜不數○不
讓現在不譽已往○雖極菲薄必歡悅感謝
而食○不搔頭不抓體○不戲言不謔言不
說無益不背毀○爲主人必親身陪奉不

使不勞客。不叱僕侍。○客止手必再讓。○客止然後止。未有主人不食而勸客食者。○副齋宴客。開齋爲佳。○舉食必名。食畢必告爲主人祝。○食已。誦告赦辭數遍。以消在席閑言之愆。○客至必迎門。携手而入。安座。歡言溫語。賄故不恭。叙舊情誼。及諸宜說時事。○饌必早豫。客至現成。以示容易。○貴物不稱貴。美物不稱美。希罕不說難得。○有請必赴。○應答良賤之請。雖盞乳腿兔不辭。○不應。

鄙吝人請曰鄙吝人之饌毒也。○不應聲譽人請曰誇勝之饌無吉。○請赴之意必均爲主喜。爲穆民喜。○設饌量力。不圖嗜好。不爲誇富鬪勝。○饌取客所好。勿取自己所好。○至赴請必爲主人告吉。○饌畢則退。經曰請則赴。饌畢則退。毋以說話留戀。致愧主人。○退必辭。○主人送客必出大門。

待士

待門人如兄弟。起敬起愛。○日與講學雍容。

和氣悅色微聲。○勵其學。不稽其隱。嚴其禮。不責其細。○不自居尊位。取便而坐。弟子舉上位讓而後坐。賓至弟子立。賓退弟子坐。○坐床弟子進亦令坐。床不敢坐。誓令坐之。○坐弟子中。不伸足。不見胸。○不先弟子坐。○不虛坐。必有訓教。○問事于弟子。如問于師。○同坐以事。事畢衆起。然後起。衆退然後退。○弟子笑聖微哂。弟子驚奇。聖亦奇之。遂解其所奇之故。○每遇事。必與衆士商之。立數

議聽其擇取。○呼弟子以號。不以名。無號。卽因名命號。○弟子有道不合之言。不正其言。弟轉面以示之。默。○禮拜。弟子至。卽輕簡。完拜而問之。有求乎。了其求。復禮拜。○弟子歌。聖和之。弟子詩。聖聽之。弟子請。聖應之。○迷。○落格之言。行笑。聖咽之。必戒之。曰。毋落背。○不戒。弟子之言行。除失禮。或犯正。

結友

交結無貧富貴賤。益我者爲友。○取其所長。

棄其所短。○聰于其艱。審暗于其諱疾。○曰。
有觀德。攻不德之友。罕見其人也。○結友而
至于禍患。絕交爲佳。○結交而兩益。至貴于
選靜辨功。○與益友坐談。強于禮武。討勿爾。
拜。○友是我之中。○友是左右手。用力必扶。
患難必賴。未有勞于一而安于一者。是或病。
焉。○好友別三日。則致書問之。○交易不取
利。允情不受賄。○餽答有常。○先施之不望
答。○不以事累。○托事不相疑。○無惑于外。

跡無徵乎隱藏。乃不致嫌隙。生心伏怨。致仇。
○穆民之交。揚其美行。諱其隱過。不以間言。
疎其情。不因讒言。拂其義。○交非一日而成。
不可因一言而毀。千日之木。而何一斧伐之。
○聞善則慶。聞惡則諫。三諫不從。絕交。○交
以學者。不希其餘。交以力者。不望其外。○交
人以道。不以勢。○交處貧寒。往顧羸弱。貴于
出征。亦當治驕之要藥。

和隣

敬隣如敬親。凡有能勾之事。皆與共之。○曰
隣有同爨之責。富兼三家者。有三家之責。兼
十家者。有十家之責。至四十家而止。前後左
右各十家也。○和隣之道。有禮儀有損納。總
要在于先求仁里。而後宅。不彼饑而我飽。彼
寒而我煖。心虛身顧。以有餘補不足。○擔其
傷害。毋致傷害。○有益必施。及其隣。○餽送
隣里。無多寡。○隣有求。必實其望。○大事必
助之。○喜慶憂吊。○記識其家人名字。○背

頌其德善。母揭其隱諱。○不傷其狗。○防其
鍋。○必有餽之。○凡佈施先及其隣。○不業
隣里之所不欲。必告取所樂從。○凡當責于
我者。毋責于隣。○隣里雖異教。必敬愛如常。
○隣有三重。比居者。比居而同教者。同教而
復有親者。三重之責。甚于二重。二重之責。甚
于一重。○曰。哲白而衣。勒時以隣里之責。囑
予。至再至三。吾幾疑隣里可受遺財。○隣有
朱乎。得嘗以垢污致聖宅。聖親執箒除之。不

委之奴婢。久而覺之。朱乎得歸。依聖教。

藝業

曰。吾少以牧駝爲業。迄爲聖。以教化爲業。旣
遷。然底納。以征伐爲業。○業無大小。完其生
已矣。○萬業歸于四學。農、工、賈、是也。四業之
中。學爲尊。可爲帝王師也。次農爲貴。農乃人
養命之根。萬利出焉。次手藝爲尚。以本領而
食也。至末者賈。以財易貨。復以貨易財。而食
其贏。多廢經營也。○農費工力。學天爵也。手

藝人工也。聖人既受天爵，則事人工，故千古
聖人不廢手藝也。一德里師縫衣，達五德造
甲，速來馬尼編籃，以下喇欣務農，販羊爾撒
補衣鞣鞋，洒立合織袋。○藝業是衣祿之慢
帳，亦謙下之因由。○尊爲帝王，貴爲后妃，必
事農桑，乃知稼穡之艱難，衣食之不易易也。
○民庶攻藝業，以利家國之用，其功不在聖
賢之下。○營業有道焉，謀爲自人，予奪自主。
○必以忠信，以公平，無欺于好醜，無繆于價。

值。○交易取易而無難。難則非所業也。○買之易。賣之易。買之難。賣之難。○生易有始。易而終。難者有始。難而終。易者端在人之能守。與不能守。見之始而。易者不能守。妄廢所得。得之易。失之易。終見其難矣。始而難者。能守省儉用度。不吝義施。知所取與。豐嗇皆由于主也。○感恩增恩。終見其易矣。○營藝要有胆量。三市而不利。則遷。三遷而不利。則忍耐。聽乎主。不希望于人。忍之忍之主。必開之以。

亨通○人不可無業不可盡托于業業爲因
由而衣祿自主也○賣物得利卽以此微給
貧一以爲感恩之據一以罰語言有過也○
買物復退無阻○買賣有任擇之例○以義
取利合喇勒也欺謾取利何喇目也○無無
利而賣除黨友或就急或時價之變○濫賣
治罪○亂市者官斷之○稼穡必舉意並濟
中生鳥獸咸得其利○畜羊如務農滋益多
賴焉○畜鷄禽亦然利益較諸業爲勝○市

禁三事。搔目也。謬爲添價買物以納直斯也。或買者增價也。感賣者讓價也。以迎商奪買也。○禁堆積糧食待價。○禁欺謾好醜。○聖見市麥以手探之得濕。曰何故。對曰雨也。曰胡不表其濕而俾買者見之。無謾矣。乃得合喇勒之利矣。

干求

聖人曰。干求難事也。不得已而爲之。寧不求爲佳。良士無求。高志不求。寧死。○囑掃巴尼曰。毋求人。掃巴尼極貧士也。○設有難于已。

而爲之有歟。斷焉。潘閃白。日沐浴禮二拜。頌
法體合章。阿葉忒庫而西印那安宅裏那乎。
然後讚主。讚聖。而出投諸富而尚教。素行仁
義者求之可也。有所得。感謝主。並感謝其人。
爲做好都阿無所得。亦感謝主。不刺其人。忍
耐乃開萬事之鑰也。○嘗念主。主必易其所
難。○富而不尚教。或尚教而吝財者。則勿投。
投則兩辱。○于求以不落于困厄也。以易易
難。可不爲乎。以難易難。其可爲乎。○是故富

志之人。知千求之不易。不以難易難也。○君子諒其有求而與之。不待乞。小人乞之而不與。良士何爲哉。

旅行

旅遊爲求學。或行行。或逃災。或爲觀覽造化之奇勝。皆損納也。經營商賈。沒巴合也。○日爾人保守出行者。旅人在主保護裏。○旅行在晨光大展之時多吉。日在天羯宮與月尾爲忌。○凡出行誦此奉主尊名。吾歸信主。吾

投庇主。吾托靠主。無能無力。惟以主主也。吾
求爾庇我。于道途崎嶇。佑我旅中艱難。防我
家財變壞。○隨身帶梳子。刷牙。眼藥。罐。刀。剪。
鏡子。纏中。拜墊。皮鞋。布履。錐針。線袋。雜藥。兵
具。筐籠。○乘騎勿睡。○載毋過重。程勿過遠。
○旅伴如隣。相助相濟。相和相愛。○不市不
宿。○下宿必先查點同人。○乞丐入先施之
○登山下川。登舟上岸。俱有頌讚告辭。○毋
遠征。涉貪也。○毋洋海。涉險也。○朝覲征伐。

雖遠可也。○毋入無君之域。無官司之城。無法度之國。○毋入瘟疫災禍亂之處。○每到處。○饒先蔬素。緩食肉。少飲水。○還家以已時。入城爲佳。○歸第先候雙親。次問稚童。次問妻子。次問奴僕。次及隣屬親友。響來問。

商議

聖人以通天之才。遇事必與群弟子商議。或立數議。與群弟子擇選。或群弟子獻數議。請定于聖人。○曰爾等與達者商之。不得其人。

與眷屬商之。嘗取其主意之相反。○凡以此
事而得禍者。勿與之商。○商議乃處事之鑑。
鑑所以熟玩其事之當行可止也。○集數議
而取其善。集眾善而取其至善。○無傷彼此。
無貽後患。○勿與世法人商議道法。勿與落
泊人商議營求。勿與鄙吝人商議施用。○毋
與妬者商。勿與小人商。勿與幸嬖商。勿與落
磊人商。○不得其商。聽之于主。○舉善念。行
善事。百務皆吉。

醫治

療病以鍼灸藥劑損納也。○曰鍼頭治七種
病。痰瘋面瘋白癰瘋頭痛目暗牙痛腹痛。○
歐聖爾病目聖命以蘆薈水點之。○曰須
知藥治是因由醫治乃真主。凡人認爲藥治
之能。隱逆主恩矣。○寫經和水飲以都阿佩
身書額書病處俱宜。○毋以何喇目治病。除
用火煨過。或用他藥製過可也。○人與豕二
者之物。雖製過勿用。○或云童便人乳治藥

可也。○凡用藥誦此奉主尊名醫治者名了立者名平安者名。天地間凡物偕其名則無傷其爲能聽能知者。凡人虔誦此千遍萬病得濟。

占卜

占事以通微達理而行義者之言可也。○偶聞一語偶見一物。卽以卜其事可也。○毋信市卜。其以利卜也。利卜不准。○須防忌惡之言。于事不利。○見奇勿以奇卜。見美勿以美

卜須畏之。謹防其事之忽變也。○凡見可忌。卽念喇蒿勒言避之。○勿以一切生靈卜事。轉變多也。○聖每見可惡之事。則求主佑而爲衆生求佑。

占夢

占夢以真廉實行。學識超常。而深諳夢學之言者爲准。○得夢母驟問。毋緩問。須自巳參詳一番。質諸已往現在之事。若有可合。占在其中矣。不必更問。設有疑焉。問之可也。○無

對婦人言。無對小人言。無對多人言。○過午不問夢。○早問夢。凶多化吉。晚問夢。吉多化凶。○真夢猶聖受之。幹合一。真主爲吾聖爲聖。四十六分之一。卽真主之醒覺也。○一夢而有一百四十四樣占法。執經執見。非善占者也。○得吉夢。少爲散財。以感謝之。得凶夢。多爲散財。以祛避之。佈施能消一切災禍也。○見善夢。誦此感讚真主。導我明路。若非主導。決不得道也。見惡夢。誦兩固理額歐足祛。

之
居處

聖執帝王之權。居萬國之尊。而不處宮闕廣
廈。第曰容身足矣。○堂宴客。室棲身。厨治饌。
餘室則曰客室。室之課也。○戒曰。勿營廣廈。
勿窮美工。勿施彩飾。○營費多財。是比得而
惑。○禁鋪陳虎狼皮。○不畜犬。除爲獵。或野
居防財。○不處空室。不處無門室。不入久閑
室。不入密室。○凡人家。高聲道色。喇目應。

請而入。○空室藏邪魅。見之則念固。理乎祛之。○久閉之室。入之必火。○大喜日。鋪氍結彩可也。○雷不過隣。溝不害隣。○治屋必及隣。○起高樓。必和之隣。○出室入室。俱有誦告。○營宅必視其里。毋過大。毋過小。過大取妬。過小取辱。○是故卜居以擇里爲要。○曰先隣而後宅。

冠服

服尚布。不用帛。○曰絲帛金銀。在吾教。生男

于是何喇目。○色上白。本色也。○愛綠。天授
萬物之正色也。○不用紅黃紅艷色也。黃僻
色也。○不多施紐絆。易服易脫也。○衫襖袍
袴袂。披風。袖祖領伏。短褐。各以時服。○常服
格米索。小襦無袖。襟敞而袖寬至腕。○打補
大袍也。長至兩踝之上。○衫袴掩脛。裏掩膝。
○衣整潔。不破不垢。○禮拜賓會必盛服。○
主馬日兩節拜。朝賀會親俱新服。○忌衣長
至足。惹垢也。○拜服忌短。不掩膝。褻禮也。○

衣必複。不露體也。○服先右。脫先左。○服衣必有頌告。○服新衣必在主馬日。頌法體海章。○喜服鎖伏曰鎖伏。列聖之常也。○喜服白曰服于生者。斂于死。○常着皮履。旅行則靴服先右。脫先左。○功課多。跣足爲謙也。○嘗市行。隨便衣冠。亦不在拘滯也。○先服衫。後服袴。○坐褥禮也。○被褥厚。不用柔細。○絮用棗皮。○袂衣不縫。不飾不緣。披肩而下。○戒婦人衣短狹。禁男子衣紅紫。○男衣宜

短免沾濡也。婦衣宜長掩全體也。○冠上加
巾。損納也。○時或不巾而冠。時或不冠而巾。
○涼冠覆耳。熱揭帽。○常携格推法。披墊也。行
則負肩。坐則墊帶。銀印。欽寶石鈕。以爲封號。
發旨四方。以教化諸國帝王。

食飲

喜粗惡細。○多食大麥。○不食重羅麵。○饌
必有蔬。曰蔬能祛邪。○喜羊肉。曰羊肉增聽
明壯身體。食中之魁也。○晝夜一食。曰重食。

爲浪費。○喜飲羊乳。曰羊乳止渴奈饑。○食無飽。曰飽食息信德之光。尚教者第一壞事。是飽食也。○色變不食。味變不食。重者不食。曰有毒。○以三指食。不以二指食。曰魔食。以二指。○以一指食。密不以二指見人。以二指食。密戒之。曰一之一之。○喜聚食。不共匪人食。曰共君子食吉。共小人食凶。○不食極冷極熱。○不食于金銀器。○常數福爾坐。而席地施矮桌。曰數福爾坐。吾民之常也。設椅席帝王

之常也。托之中皮。譯地之俗也。○大碗大盤
爲損納。○不葷肉。○不刀切餅。○不臭不吹
○不飢食。合則用。不合則置。○不立食。不走
食。○視食而食。不旁顧。不仰視。○食飲以右
手。惟甜瓜以左手。○不食葱蒜。除熱者。○不
食韭。○最愛芹。曰赫子爾。以力鴉師喜食芹。
曰益氣祛癩痰。○姑人食蒜曰卑濕之地。可
祛瘟疫。除濕病。○蒜和芥食不臭。○食餅用
芫荽與醋損納也。○不食八物。膽脾膀胱。挈

凡莖勢大腸。小腸。肉中餘血。雖不曰何。喇目。
食之爲過耳。○正面而食。○尊敬而食。○不
倚坐。不側坐。不箕坐。第如禮拜之坐。曰吾僕
也。當如奴僕之坐。○食必有鹽。曰鹽和萬菜
之味。法萬味之毒。療治萬病。○食必有醬。曰
醬味美。去腸胃積垢。○以醬以甜瓜和餅食。
○饑而後食。曰不饑而食。如無因而笑。招主
怒致貧。○食之初終有告。○食之前後浣手。
曰食前浣手祛貧。食後浣手祛罪。○食後剔

指曰此致祿祛病之由也。○別指不以棗蒂。不以石榴刺。不以竹片。○不用箒刷香草衣襟。拭手。○食指啞而後抹。不重啞。不以桌巾抹。○喜石榴曰美品仙饌也。食之益智。娠婦食之生美男子。○嘗食萬年棗曰萬年棗仙祿也。○食甜瓜先玩美良久。讚誦而後剖曰食哉。飲哉。甘香哉。○愛蘋果曰仙果也。娠婦食之生仙容子。○以一切果仁和酥油食曰益智和胃。久服止炊。○喜葡萄曰明心益智。

○喜無花果曰仙品也。增聰慧。癒一切疾痛。
○愛橄欖曰天堂果也。治七十種痰火病。
○每進鮮果。親口拭目。溫存告吉。
○凡取果實。取單不取雙。
○最喜蜜。曰密通利五臟。和百味。
○曰三物可強神健體。美香柔衣與密也。
○聞香花讚主。曰香花醒脾省心。
○食各種香花。開聰明。益脾胃。清利五臟六腑。
喜野性。曰食野性可通神明。而自不獵。
○曰世有二寶。金也。穀也。二寶者。散漫天下大地。無處無。

之不產金處卽產穀。不產穀處卽產金。舉世之人爭此二者。然爭積者愚。爭食者智。○曰爾人須惜穀。夫穀者天地之吉積也。○斗珠不如升米。斗金不如塊土。○穀之于諸食。若首之于身也。爲萬味之根。諸食有慊。惟穀食無慊。○嘗食哈里撒肉粥也。哈里撒壯筋骨。強脊背。補精髓。晨食至夕。不饑。夕食至曉。不倦。曰常食此。一人可兼四十人力。○綠豆清心明目。千古聖人讚之。○麥麵爲食中之

魁而稻米又食中之王也。○稻米爲萬食之尊。兩世之萃食稻者。聰于食麥者。○食蝗曰蝗天兵也。其翅有文。云讚主清淨。降蝗于民。一則以害。一則以利。謂害禾稼而利人食也。○爾巴士子與哈參食蝗。士曰貴子亦知其翅文乎。曰未也。曰吾曾聞之于爾外祖聖人矣。其文曰云云。○聖偕阿以涉大盤食蝗。阿以涉怯曰。是何可食也。聖人曰。款乃蝗食之以知款也。○每出蝗。聖以兵捕之。或曰蝗天

兵也。宜傷乎。聖人曰。何傷乎。捕之爲祿。入水成吼。忒。○食有數條。宴客者尚之。飽食暢飲。冬日火。夏日涼風。不置客之所惡。不拘客所處。清言鹽醋。錐水盤刷牙。寢睡必有夜器。晨起必有梳及點藥罐。○一人之食。不斲與二人。二人之食。不斲與四人。四人之食。不斲與八人。蓋曰飽一人之食。可勾二人。二人之食。可勾四人。四人之食。可勾八人也。○曰持家過活。僅取至易。當有時節儉。則不致無時食。

佈施。○聖人生未曾食鎖得格。○有時無過
夜之食。有時存一年糧。○食多用陶器。或木
器。編棘爲簋。示謙且儉也。○不用金銀器。曰
此王者具也。○食器俱有蓋。○不用損破器。
曰裂缺器。墨乞魯舍也。○席設刀匕。不設鹽
罐。○食具美潔。美食美具。○宴賓必全具。無
再須牙杖拭巾。水盤齒刷。○饌有美醜。治有
精粗。惟不廢其所使。則善治饋者也。

視病

喜慶愛吊。問安視病。損納也。○士病二日一
視病疾。一日一視病危。則坐床待終。○對膝
而坐。不對首。不旁視。上下左右。目矚病者。不
久視。不疾視。不多話。善言慰之。告以長壽。報
以卽得痊。可使無憂。煩戒之思慮。須存想真
主。求主賞安。清心養氣。絕慮凝神。卽可釋病。
○曰視病而以善言慰之。美喻輕之。至善之
視也。○對病人默念此七遍。奉普慈獨慈真
主尊名。吾求大能之主。護庇安寧。誦此

七遍。吾求尊大保養。尊大天關之主醫治之。
○病者哀哀視者亦哀哀。曰哀以罰贖其過
也。○視病無遠近。雖勞車馬不辭。○視病無
驚聲。無咤聲。無怒色。無瑣細。其後事。無責其
致病之由。○善喻病者。念主做討白。善度保
養之主。○討白以三事。一痛悔前非。求主恕
饒。二痛絕其事。永不再犯。三屬意辦功。一行
不遺。如有缺欠。天命功課。卽囑親人用其遺
財。遵例罰贖。○囑病者事也。無勉囑除事關。

重大。○領囑天命也。必終其事。有所缺欠。主
罰報之。

哈參問

哈參問于欣德氏曰。聖人之儀容。可得聞乎。
欣德對曰。聖人儀容之美。非語言能喻。非文
字可傳。安足以聞。哈參曰。述其槩。吾得以方
其理可乎。欣德唯唯。然後曰。吾將述其槩也。
聖人儀容。端正謹嚴。文美風雅。面如滿月。髮
如細絲。根根見肉。理之一根不亂。綰之色黑。

如炭委之過股。頭顱渾圓。額頰方廣。眉橫一字。兩端包過眼角。清疎而細分。中有赤筋。怒時可見。隆準豐頤。肌膚白亮。瑩光射人。目光如電。項色若銀。齒如編珠。方口大耳。唇下有窩。齊髭長鬚。三絡飄揚如線。胸前有肉印。蒼質赤文。蓋清真言也。印下有毛。長垂至臍背。腹般平。指掌綿厚。肩闊臂長。諸體適等。膚色如繪。光白裏見紅。目睛最黑。目白最白。白中微有赤文。身材中平。不長不短。而立億萬人。

中只見其長肌膚不肥不瘦而在極美人中。
只見其美。染髮髮亦可不染白者僅十四根。
不膏不見白復變紅。周身發異香。襲人勝於
冰麝。而冰麝近之反不覺其香。國人以聞香
知聖至。過處留香四十日不散。白雲罩頂如
傘。蓋人嘗覓聖以香以雲。卽得聖自生至已
如是。然底納有嫁女告助于聖者。聖曰無可
贈也。明日以餅來。聖以木杖濕其兩脇之汗。
予之命以膏髮。女屬之。容如仙子。而香聞遍

國時人名其女曰香姐。名其家曰香室。○哈
參曰。其動止可得聞乎。欣德對曰。聖人之德
性。天地秉其量也。日月秉其明也。孰能言傳
弟。見其舉動規模。世所罕有。如春風流水。見
之無不生愛也。常悟多默。不取世好。不貪世
樂。不苟言。言必始終。言簡而深。語約而該。舉
動從容。義理無盡。不毀人。不責人。恕人律已。
凡一切天道人道之事。功不自恕。纖毫不私。
怒不報怨。指點必顧。不仰視。不旁顧。視物必

正而行步如登。目不出一身。每行門徒先引。天神後隨。遇人先道色。閉怒惟眉蹙。樂則閉口笑。惟哂見奇。展手言際。拿手以左手大指納右手掌。念念真主。事事道德。聖人之事。不可言說也。世子之問問其表表。猶不可竟。況于其裡乎。淵哉淵哉。

侯腮尾問

侯腮尾侍父側。偶有問焉。曰。小子有問。希乞尊人之允。爾里曰。諾。侯腮尾曰。小子聞之。聖

人稱人極。乃天德人道之表也。方予孩提。未識聖人之動靜。敢請記之。以爲天下後世傳。爾里動容有問曰。洪荒大海。小子弱足而思涉耶。聖人如天。莫攀其高。聖人如日。莫擬其明。聖人于山海莫測其廣大。淵深。小子之問。何其肆也。以規量天。就規取度。以葦測海。就葦取則。卽小子之問。逢予之見。亦庶見一斑。侯肥尼曰。敢問其起居如何。爾里曰。聖人一出。一入之間。有三意。爲主也。爲人也。爲世也。

爲已者亦人我兼求之事也。乃以尊貴之規模示人。而人得以效法而取益也。凡爲聖人教生。不可不知此三意。不可不以此三意爲法而遵守之也。其爲人者。乃命人取擇行事。各量其自己之分際。以遵其禮。或須一。或須二三。或全行之。各量其所宜而盡其義也。其爲主者。則命善止惡。誅凶討逆。以完夫天命之貴而已矣。至其應酬問答訓導之方。在席者聆益。遠處者入記。亦在。各人領會得淺得。

深在人而已。非教門之言。不言。非教門之事。不事。凡因所求而來。必得所求而去。○侯臆尼曰。敢問聖人之言動如何。爾里曰。言必踐行。行必顧言。不得不言。乃言。可以不言。勿言。雍容和霽。敬長尊年。服事有職。教人不倦。誨人不厭。全體道德。無貪無吝。求人之所有。善善而引助。惡惡而畏避。公而不私。直而不曲。醒而不昏。治理惟勤。百務惟和。善處事。必與人商。不怠政務。加謹天功。周全人事。不托重。

于人最愛輔道興化之人最尊盡忠盡孝之人。○侯臆尼曰。敢問賓會如何。爾里曰。對人如對主。謙抑屈下。不坐獨席。禁人獨席。取便而坐。不虛坐。必有訓誨。與人同坐。必衆起然後起。衆退然後退。不靳數求。了其求。或取其悅。慈愛衆生。以天下爲一身。文美安靜。正氣逼人。無閑言。無高聲。不言人過。不言隱事。不言希異奇怪。言必有本。言必稽實。敬老慈幼。尊長愛貧。恤孤憐寡。人坐而坐。人起而起。○

敢問接人如何。爾里曰：悅容、美性、和緩、低聲、不欲、不近、拂性、不怨、不辱人、不賤人、不揭人、慢衆人、笑聖微哂衆、驚竒聖亦竒之。鄉人愚蠢聖忍耐之。與人拿手人伸而伸人釋而釋。當言不訥問而後答。聞必竟其言言必盡其理。拜長諭短。軫念老幼鰥寡不飽食不安寢。○敢問處已如何。爾里曰：謹言在四事。擔待也。隄防也。度量也。叅悟也。忍人所不能忍。耐人所不能耐。犯而不校。激而不怨。臨極險極。

危秦如也。防患避惡。臨事而懼。猶恐有一毫
髮之不中禮。兢持敬惕。戰如也。凡事聞見于
人者。必審度其是非。凡事遇于兩世之間者。
必參悟其去就。一動而爲古今模。一言而爲
天下法。晨昏憂慮于民事。並無溫惡于安危。
只惟民衆兩世獲安。而無患是念也。○敢問
聖人之容貌如何。爾里曰。首圓目朗。睫長鬢
密。而根絡如線。膚色光潤。手足強健。行步如
登高履卑。不擺手。不見胸。肌色白裡見紅。目

黑最黑。目白最白。香汗如珠。顙而芬馥。襲人。
身材不長不短。立萬人中。只見其長。眉開額。
廣。不肥不瘦。雖仙女不奪其容。兩肩之間有。
肉印。蒼色赤章。卽清真言也。唇下有窩。齒光。
閃灼如編貝。手掌柔細如綿。力不縛雞。而勇。
敵萬人。而萬里之外之人。莫不畏之。易卜尼。
爾巴士曰。吾生平未見勇於聖人者。阿以涉。
借針于哈甫奴。針失燈滅。聖人至。面光照地。
拾針。阿以涉笑復嘆曰。嗟乎。未見聖人之面。

者不之信也。○覽鏡梳髮不得鏡卽照于水。每正鬚髮曰主喜人欲視人先須視已。摘鬚結髮黠目齊髻。○敢問聖人之謙德如何。爾里曰謙于愚夫愚婦騎無鞍之驢。應對奴賤無坐地不得。寢地枕塊坐地而食呼之卽應引之卽行。敬贈必受。掃地穀乳捉虱縫履繫駝峴草下書與侍者同坐同食和麪治餅炊爐市物取至家作工如衆分賞如卒笑客語人童叟一般問疾省困見人手裂問故對

曰爲家眷炊聖以口親之。凡與商一事必立
數意聽其擇取。並坐不出其膝。同行不出其
身。坐不礙人。行不先衆。先人行如失。後人行
如從。嘗鋪衣與人坐。自坐亦與人俱坐。禮拜
有求者至。短拜了其求。再禮。宰割烹飪必共
之。衆請勿勞。曰真主惡夫衆人執事而一人
坐。自磨麵提水。敢問其廉行如何。曰聖人
不受天子之尊。不愛華譯之富。行教一生。無
錙銖之畜積。曾以家計故。當甲子朱乎。得不

當與本教人隱之也。生不問世故。畧治生產。
了意而已。曾三日不炊。生不飽食。嘗饑寢。寢
無褥。以皮革實棗皮爲絮。聖寢于鞞。哈甫奴
寢于袋。哈母魄之數褥。因寢于四褥。晨起曰。
較往夜如何。對曰美也。聖人曰。未若往之爲
佳也。重褥不德。美寢誤待。遂轍三留一。嘗見
脇有聚葉編袒之痕。阿以涉曰。日計亦可無
求乎。聖人曰。日計主定也。何須求。求則疑貳
也。吁。阿以涉爾知之。世界是無宅人之宅也。

是無財人之財也。治世之人。是至無智之人也。吾與頓了何有哉。前輩列聖至艱于我。俱到主矣。得主之品。享主之福。吾愧于今世如意。後世不得遂也。言後未一月歿。○敢問聖人于其父母如何。爾里曰。聖人生未見父母。而孝親之心。罔極。嘗曰。父母其代真主而生人乎。鞠育之恩。較天地爲勝。嘗爲父母憂。曰。吾之親生非其時。死非其道。易卜來欣不能庇其別教之父母。吾之父母其能免于後患。

乎。嘗禱赦於主。命曰。爾爲吾產。祇念吾民。不
得私爾親。順者有赦。逆者無赦。彼夫愚教。聽
斷于子。撫母墓。泣涕哀痛。告赦再三。弟子皆
爲之慟。聖人曰。汝輩何爲慟。對曰。見天差慟。
故慟也。曰。汝輩知吾慟之由乎。對曰。不知也。
聖人曰。吾爲吾親告赦。命下曰。祇念教生。不
得私爾親。吾不忍父母之罹後禍也。是以慟
之。弟子問于聖人曰。父母有過乎。曰。誰人無
過。孝子可致父母于無過也。心敬身承。躬曰。

侍妾不違其一切所命。見有過。婉容悅色以諫。少悔。未有父母。以子之順承而詆厲之也。吾曰。聖人憂于其父母。終身不能釋然也。○敢問。共服食如何。曰。服布不服帛。禁男子衣帛。衣之長短適宜。雖夏暑必複。冠上加巾。時或冠而不巾。時或巾而不冠。色尚白。喜綠。不用紅黃。食大小麥。喜粗。忌細。不食重羅麵。不菜而飯。不油而羹。客至隨其所有。必饗之。客無貴賤。必躬自陪侍。食坐如拜。膝壓膝。足壓

足曰吾僕也。宜如僕坐。不倚坐。不箕坐。食取
近不越。取食以三指。大指食指中指也。或助
以無名指。或以掌食。不以二指食。食密以一
指飲。水于盞。桶餅罐諸器飲水以掌勺。或傾
水于掌。曰器莫爭于手。亦嘗罐口吸飲。不吹
餅口曰致臭也。離口而吹。時咋噉而飲。時一
氣飲。每飲誦名。食不多語。不語曰異乎。二
氏也。以食就口。不以口就食。捧食尊敬而食。
食取小不啮。曰餅饊以小爲佳。餅饊擗而不

嚙視食而食。必視所由。必知味。必念念真主。
潔因潔取。潔治。潔器食也。潔手。潔口。潔身。潔
心。食食也。聖人之于飲食也。較諸事爲加謹
焉。曰一口不潔入腹。四十日不准功。

方聖賢錄卷之十八終